

銅山縣志卷之十二

銅山縣知縣崔志元纂

名宦

下

元

燕只吉臺徹里世祖時爲徐州達魯花赤崇尚經術  
周知民情鋤強扶弱吏民畏而愛之

三寶住至正辛丑進士性廉介所至搏貪猾無所貸  
以江浙行省郎中爲徐州兵馬司指揮

明

文景宗合肥人洪武初自婺源州同知來知州事廉

銅山縣志

卷十二

名宦

一

介有守時天下初定瘡痍未息民多流離乃招徠  
賑貸勸督農桑民以安集歷任久創建州治公署  
壇墀祠廟興舉學校民不勞而事集遷濟南知府  
去

劉秩字伯敘豐城人吳元年由內翰典籤檢閱經史  
官出爲徐州同知文章政事皆見稱當時與知州  
文景宗協力修政尋詔入議大禮遷知崇明州民  
爲立生祠有詩集行於世

馬良崑山人洪武初以薦舉授徐州衛知事明習法  
令糾繩軍政上下咸服嘗與指揮蔡祥協建衛治

後陞德慶府同知其孫紀遂古籍於徐

楊節仲湖廣樊城人洪武末以薦舉知徐州守已愛民獎進士類爲政一以厚風俗爲務會郡大癘遣醫四出療治其貧不能具藥物者則捐俸製劑給之在任六年政化大洽秩滿陞大理知府去

趙燹字秉衷虹縣人其父兄皆忠死燹由永平衛指揮僉事遷徐州衛指揮使歷陞北平都司都指揮使建文末以靖難功進封榮祿大夫柱國忻城伯永樂十三年鎮徐政令嚴明居心平恕官軍咸畏愛之

銅山縣志

卷十二

名宦

二

丁鎡字永時南陵人永樂中以書法徵入國子監除戶部主事出使徐州倣汲黯事便宜發倉賑饑全活萬計仕至刑部左侍郎

楊秘山西遼州人宣德四年知徐州多惠政郡中公署廟學悉爲增飭秩滿當代屬邑乞留詔增秩復任先後凡十八年迄今頌之不衰

宋驥餘姚人宣德癸丑爲徐州學正恩義兼盡勤於教誨一時士多成就

張達字時達泰和人正統末登第授工部主事督漕運呂梁適歲饑徐淮民相食達遽發倉賑之然後

以聞活民甚衆

王竝字公度湖廣江夏人陝西河州戎籍景泰二年  
以僉都御史巡撫地方德威並行一時汙墨者望  
風解去四年徐洎蕭沛諸邑大饑疫民日就死亡  
流離竝憂甚亟令有司發粟賑貸又令設粥食貧  
製藥餌療病全活數十餘萬人又請頒詔遣祭境  
內羣神率屬秉虔爲壇祭告災癘浸消民始蘇息  
行部至徐賦苦雨詩二章憂民之意藹然言外尋  
進副都御史罷去民思之如慕父母天順中復召  
起巡撫故地徐人聞其至老弱扶攜迎候道路以

銅山縣志

卷十二

名宦

三

數萬計爭相擁輿入行臺以次進謁踰三日未已  
尋遷兵部尚書乞病歸

宋誠字彥實湖廣蘄州人饒有才識景泰中由劔州  
知州改任遭時饑癘與巡撫王竝協心共濟多方  
賑救往吏多怠玩廢事誠繩督弗少假借政務修  
舉吏民畏服凡公署學廟次第葺治百廢俱興又  
以政暇修纂郡志文獻賴之遷敘州知府去

張德瑄福建侯官人景泰中爲州學正守正不阿或  
懷百金求爲請託輒麾去多士敬服有司重之

王敘字大倫臨汾人天順中知徐州廉潔自持泣政

嚴明篤意學校諸廢墜多所修舉遷慶遠知府去  
郭昇字騰霄潁州人天順間以工部主事督徐州洪  
洪舊與呂梁同稱最險歲壞舟常百數昇相要害  
募人盡鑿去其石水勢遂平爲功甚鉅擢郎中仍  
泣洪事民於洪上立郭公祠春秋祀之

陳廷璉字宗器湖廣攸縣人成化中以進士知州事  
才識通敏爲政敦勸風俗宏獎士類遷南京刑部  
員外郎去

應廣平浙江黃岩人成化中爲州學正端慤不苟善  
立教規臨諸生無疾言傲色以憂去士追思之

銅山縣志

卷十二

名宦

四

和鸞字廷瑞山西平定人成化中由舉人知州事性  
鯁介不阿以廉慎儉約自持遇事有定見不爲遷  
就初以執方迂監司久之轉加敬信衛伍事赴訴  
者悉爲聽皆獲平反在任八年深得民心遷襄陽  
守去

沈同和字尙中烏城人成化中同知州事清介有守  
臨民不縱不苛在任九年遷州守去

汪舜民婺源人正德初以山東副使按徐廉介剛正  
惠威並著屬官吏無敢侵漁部下者值歲饑多方  
拯救仍請撫院發粟爲賑全活萬餘人

余祐字子積江西鄱陽人成化己未進士正德中爲  
徐州兵備副使因詰進鮮中貴私貨被誣逮廷杖  
下詔獄獄中著性書三卷謫南寧府同知卒爲理  
學名儒

莊禪字誠之宏治丙辰進士少貧好學以文知名既  
第令寶坻擢戶部主事出督徐倉會歲稔禪發倉  
以賑監司難之禪曰卽有罪當坐禪後報可以忤  
劉瑾罷歸

李珏字廷重開州人正德末任兵備副使性平恕御  
事敏決案無稽牘時山東逆賊王堂掠及豐沛境

珏調集驍勇拒之旗幟以李兵爲號賊大敗遁去  
山東河南二省官兵勦捕者率用李號其威望如  
此又整修學宮士民懷之

李香字汝蘭分宜人正德辛未進士初授工部主事  
抽分徐州值歲饑捐俸賑窮庶死徐人德之轉刑  
部至四川巡撫致仕

樊準南昌人正德中知州事廉介彊立不畏權勢政  
務節省先是中貴督廣運倉儲左右恣肆莫敢誰  
何準至一以法繩之無敢犯者會進鮮中使橫索  
驛遞供應不貲準廉得其所挾私物狀因裁抑之

尋被誣逮繫老幼號泣隨送者幾萬人抵京事白  
得調任歷官山東按察僉事

張淮字本豫義勇前衛人正德中知州事守己愛民  
時駕南幸百姓惶懼僉思竄匿淮與判官董相慰  
安之悉心經畫一切以身爲任雖供億不貲無秋  
毫擾下民賴以安

胡崇易四川墊江人正德中爲州學正動履端肅率  
人必以矩矱迄今傳其遺風

王重賢交河人性剛毅鯁介初任爲御史以敢言落  
職嘉靖中再遷知徐州政崇簡樸與民休息初州

銅山縣志

卷十二

名宦

六

以里役供應豪猾緣以培克重賢至革之其所供  
應改用贖金以亭老司其出入民間始無擾累時  
有州佐黷濫以結納怙肆當道莫能祛重賢入覲  
力白銓部罷之遷東昌府同知歷官江西按察僉  
事以疾免歸

何鰲字子魚廣東順德人嘉靖庚寅任兵備副使州  
故有驛館夫役最以厲民鰲至革去歲省民財以  
萬計民懷其仁

孫光浙江蕭山人嘉靖中知州事性謹厚仁慈約已  
愛民痛裁冗濫里甲徭役悉爲更定民獲安息焉

項情江西德興人嘉靖中爲州判官潔己愛民未嘗苟取時自秋徂冬不雨民憂惶無計情徒跣爲民祈雪雪隨大降盈尺人咸以爲精誠所感

王以旂字士招江寧人正德辛未進士授上高令歷官至兵部右侍郎徐呂洪竭漕舟滯不行遣以旂督治至則先求故道視泉脉循經流各爲䟽治自徐洪南抵沽頭增置閘又相地形引水塹築土壩河流時滙漕舸皆如期達京師沿漕渠水櫃多爲勢豪侵沒任怨力請復之至今賴焉事竣加俸一級擢掌南臺

周易廣東番禺人嘉靖中由舉人爲州學正有志操矩矱端嚴好善嫉惡教人行誼爲先講論亶亶不懈常捐俸以濟士之貧乏

吳嶽山東汶上人由進士以戶部主事司徐倉清操絕俗於利秋毫無染待人坦易人樂就之又嘗建躡雲亭於學宮之北以增勝概仕終南京吏部尙書

劉天和字養和麻城人正德戊辰進士嘉靖間漕河淤塞奉命來視河道躬負畚鍤䟽汴河自朱仙鎮至沛縣飛雲橋殺其下流又䟽泰山七十二泉自

島尼諸山達南旺湖濬其上流運道乃通進兵部  
尚書

章世禎字克昌餘干人嘉靖舉人初任武陵以卓異  
擢知德州未幾移判徐州尋爲六合令治行第一  
復知徐州以治河奏功晉秩致仕

楊宜衡水人由進士嘉靖中爲徐州兵備副使汰冗  
役八百餘人諸不便於民者皆除之時秋闈屆期  
集諸生於書院聘名士第其文藝又併商稅修浮  
橋辨疑獄善政纍纍居五月遷河南叅政去

何源江西廣昌人由進士以工部主事任呂梁洪分

銅山縣志

卷十二

名宦

八

司端凝介直遇事剖析無滯御下不少假辭色洪  
民有武斷者繩以法無貸風裁凜然

潘季馴字印川烏程人嘉靖乙丑出爲總河時黃河  
決沛之飛雲橋穀城沙河留城境山一帶河渠盡  
塞漕舟阻不可行季馴謂河性喜下決而衝者過  
賴在山之水非其性也力請復故道濬復留城以  
下六十里運道以通而徐境以無氾濫至隆慶萬  
厯間河復屢決季馴又三出爲總河皆以復故道  
爲主而告成功官工部尚書所著書曰河防一覽  
言治河方畧極精密至今人猶採用之

姚體信浙江平湖人嘉靖四十年由進士任工部督  
徐州洪事夷曠平易與人不設機防人有片善輒  
敬愛之相接諸執事嘗屈已推誠時謂其元風高  
節不愧古人

朱衡字士南江西萬安人嘉靖四年河決運道淤塞  
詔以衡爲工部尙書總理河漕衡視河道見徐沛  
之間淤爲平陸定議開新河起南陽至留城一百  
四十二里疏舊渠起留城至峴山五十三里建閘  
三十餘座爲月河六壩十有二築堤四十里運道  
大通徐人建祠夏鎮祀之

徐節山西臨汾人由進士任徐州兵備副使故事驛  
馬辦自富室分給各驛守者既不經心芻牧役使  
又復不均有弊則責富室補償之厲民莫甚節酌  
定上中下之直聽各驛自買尤嚴應差之序民多  
稱便裁石山驛開新河皆節主其議

唐鍊字純之由進士知縣擢工部主事管呂梁洪預  
築鯉魚山缺口省帑金萬餘徐境得無衝潰以才  
能改御史萬歷間復兵備徐州亦有惠政

劉經緯江西進賢人舉進士隆慶二年任兵備副使  
才識精敏狷介絕俗威惠並行每泣學與諸士講

論皆根極理要徐人士佩服之以艱去行李蕭然屬吏以贖緩助之固辭不受

翁大立餘姚人由進士歷任總理河道都御史隆慶改元徐大水室廬禾黍蕩焉無存老羸死於水者不可數紀大立悲憫之傲鄭俠繪圖以進時穆宗有觀燈採珠之好諫官言及多覆其宗大立疏曰願陛下以觀燈之心觀臣之圖以採珠之心採臣之言疏入不報中外爲大立危踰三日有旨發粟大賑其擔當敢言如此按徐易倉建學尤有惠澤諸生祠祀之

馮敏功浙江平湖人由進士隆慶三年任兵備副使時洪水爲災民多不相保功力請賑之諸賦役不  
便於民者一切停罷督理河務往來於洪波中未嘗憚勞尋遷山東叅政士民建祠祀之

王之葵撫寧人由明經任徐州判智明膽決不肯阿  
狗當流寇之亂州牧自焚葵亦堅求自盡士民力  
救得免以徐水陸要衝憲司勉以代篆視事三載  
撫恤瘡痍安輯流離民得復業一時賴之

朱光宇河南祥符人由進士任戶部主事分督徐倉  
才識精明倉胥隱弊搜革殆盡雅尚儉約崇儒重

道先是學圯於水諸生因都御史翁洳學白之光  
宇慨然卽易永福倉地爲學諸生建祠於學內與  
翁大立馮敏功章世禎劉順之並祀以隆其報  
林維傑廣東番禺人以舉人署教事天資近道動止  
合方啟迪不倦凡以身教爲先或有餽遺多却不  
受甫三月以憂去諸生佩其教澤垂涕送之

王宗沐浙江臨海人由進士萬歷初歷任總漕都御  
史故事漕舶以五月渡淮漸次踰兩洪洪水汎溢  
難於牽挽往往淪沒沐特疏請以正月起運期以  
春末過洪人茶城安流則轉輸無虞矣又立條鞭

法因丁因地輸財僱役貧富悉均甲戌歲海嘯河  
溢全徐罹變疏請留漕糧賑濟復冒風雪親按撫  
循凡有災郡邑於元旦撰祭文告社稷禳灾祈年  
徐人戴德至爲深重

劉順之廣西馬平人由舉人隆慶六年知徐州事廉  
介精明善剖煩劇徐頻年被水爲築張村站堤塞  
房村決口創週圍護城堤遍歷郊野問民疾苦請  
賑蠲恤之力行條鞭法裁定賦役學宮新遷日爲  
臨視以底於成歲旱禱雨輒應火延燒城樓望拜  
卽滅人咸以爲誠感居四年百度具飭遷瓊州府

同知百姓爭乞畱不得後上官疏畱佐淮安防河  
徐人常往謁之

舒應龍廣西全州人起家進士萬歷初任徐州兵備  
副使潔己愛人作興土類黃河溢州城數被浸與  
知州劉順之度地量財周城築堤以捍衛復求名  
人纂修州志陞任去士民爲建祠武寧門內後仕  
至南京兵部尚書

鄭繼之湖廣襄陽人由進士萬歷初爲徐戶部主事  
性至明敏人不敢欺事亦無留難關津商民交口  
頌之其廉介之操纖塵不污人方之吳介蕭嶽後

銅山縣志

卷十二

名宦

十二

仕至吏部尚書

孫養魁直隸容城人嘉靖己酉舉人萬歷四年知徐  
州爲政以寬大得民心在任十年而去士民頌之  
陳璽福建福清人隆慶元年舉人萬歷六年任學正  
性嚴正人不敢干以私七年河南聘鄉試分校所  
拔得人擢翰林孔目卒於官

余毅中銅陵人年十七發解逾二十成進士萬歷四  
年任呂梁洪主事毅中少有清望在官興利革弊  
商民德之性嗜學讀書每至達旦竟以勤致疾卒  
於官副使莫與齊爲祠鳳冠山以祀焉

王佩浙江仁和舉人有文名萬歷九年授徐學正立  
文會鼓舞諸生文風大振惜以資遷去僅得讀中  
秘書而卒

姜士昌丹陽人由進士萬歷十年以戶部主事管徐  
州倉時方弱冠洞燭利弊卽老吏不及恤軍惠商  
不聽外訟胥吏畏若神明羨餘萬金悉貯州帑尤  
謙恭下士加意學校及去士民爲樹德政碑於雲  
龍山之巔

唐民敏廣西全州人由舉人萬歷十四年知徐州事  
州錢糧頻年爲奸胥上下其手以致甲乙不均敏

銅山縣志

卷十二

名宦

十三

清審釐正宿弊盡除百姓大悅以不阿上官左遷  
去士民懷之

陳文燧江西臨川人嘉靖辛酉壬戌俱魁葩經萬歷  
十七年以御史出爲徐州兵備副使爲政崇大體  
月朔望必詣學與諸生講論庚寅辛卯郡大水城  
市以舟燧相地城南鑿支河以洩城中積水至今  
賴之

袁堯臣江陰人萬歷七年順天舉人十七年任州學  
正性簡淡博學能文兼工翰墨與諸生處五載未  
嘗以疾言倨色相加擢魯山令

徐鄰浙江上虞人萬歷壬午舉人壬辰中進士二十  
年知徐州愛民禮士性至勤未旦卽起視事一郡  
稱治遷保定府同知崇祀名宦

劉萃河南洛陽人由舉人萬歷二十一年知徐州事  
操守最堅後被白簡未行有奸民盜府庫者潛置  
數百金於中堂案上求脫重譴萃出見之大怒隨  
以金白兩臺正其罪其不以去位而變所守如此  
嗣守曾士毅四川巴縣舉人其罪徼賈事亦類此  
二賢先後繼美

夏宗謙湖廣京山人由舉人萬歷三十三年知徐州

事坦易明敏判斷如流無所撓枉學校多所培植  
在任四年考最加秩以病去士民攀送百里外爲  
棠風亭於雲龍山設主祀之

陸檄字羽行長洲人萬歷甲戌進士授工部主事分  
署夏鎮以堤束水以水滌沙疏濬啟閉皆親自經  
畫功績甚偉進秩郎中

梅守相字台甫宣城人萬歷己丑進士授工部主事  
分司夏鎮陳泐河利運狀遷郎中董其役衆議紛  
譏相身歷塗潦冒艱險閱九載績成以二百六十  
里之泐河避黃河險三百三十里舟行者甚便之

仕至按察使

王命禹浙江蕭山人由進士萬歷三十九年任以工部郎中分司呂梁洪外嚴內寬御下肅而有體加意文學立社課藝四方至者甚多時河決狼矢溝露處河干宵晝督理自興事以逮成功未嘗輕咎一人以憂去士民懷之

宋統殷山東卽墨人由進士萬歷四十四年任戶部主事政崇大體商民懷惠接士子以禮尋遷淮安知府後擢山西巡撫都御史

袁應泰字大來鳳翔人萬歷末爲淮徐兵備廉介有

爲初建學宮增修城堞橋梁濬支河洩積水察夫柳驛遞爲吏民累裁其冗濫歲饑發倉設粥以賑全活頗衆復捐贖緩糴粟以足常平徐民德之後以薊遼經畧殉難死

傅惟翼四川富順人由舉人萬歷四十五年以下邳守遷徐州爲政簡要凡可因者因之其不可者務與衆酌而後去在任四載賦平役省時有四野不識胥役一州不知有官之謠循良爲一時之冠  
史啟元字蓋卿江都人進士督徐州倉務以廉幹稱善書得晉人遺法州境碑版多其手跡

何懋基字仲修武進人性孝友舉萬歷丙午鄉試選  
徐州學正俗好爭競基諭以禮義廉恥人多化之  
未幾以憂去

趙謙山西忻州人由進士天啟三年任徐州兵備副  
使丰標俊整志擊强豪不少避以直忤俗僅再閱  
月卽掛冠去其志竟未伸云

郭長發福建安惠人由舉人天啟二年任徐州戶部  
主事性仁厚爲政務崇寬大惠商恤民作興士類  
人多頌之

張璇高邑人由舉人天啟四年任戶部主事才識明

練有擔荷商賈士民多被其澤時黃水暴漲上下  
驚懼璇於六月二日促裝移署戲馬臺之聚奎堂  
是夜河決城陷典守無失人皆服其先見因築垣  
修宇遂爲署焉鑿義井修放鶴亭衆爲立碑建祠  
張淳湖廣孝感人天啟三年由舉人署州學正嗜學  
不倦立教本諸躬行一時諸士爭自濯磨聘蜀秋  
闈分試所拔士皆不愧科名居三載以艱去士人  
懷之後登進士第由大行人爲給諫文章經濟卓  
然名世

王登哲柏鄉人天啟三年任學訓性方正醇誠有古

人風教士以敦行爲先居官七載悉却貧生之饋  
直指薦之以艱去士人泣送後起復爲縣令涖任  
五月卽解綬歸

聶雲翹直隸曲周人天啟七年由舉人以工部郎中  
分司呂梁洪甚得民心解組歸舟次新安湖中有  
羣盜駕小船數十向之左右皆驚惶賊衆曰爾無  
畏我衆來爲百姓叩謝使君耳乃各叩首以去  
張正綱福建晉江人由舉人萬歷四十年知州事沉  
靜練達不動聲色而事治民安待士子隆重有禮  
修城建學不憚勞費士民頌之

銅山縣志

卷十二

名宦

十七

吳嘉言湖廣漢陽人由選貢崇禎二年爲淮安府同  
知駐徐州以廉潔稱

徐標山東濟寧人崇禎六年爲徐州兵備叅政整飭  
屬僚訓課諸生河決常山數十里力塞之流賊至  
率將吏晝夜城守賊西走遣將追至馬家林俘馘  
而還以憂去

雷永祚潛山人崇禎五年由舉人任徐州學正性至  
孝植行方正不阿於俗教士先行後文修學宮明  
倫堂至嚴整未幾以憂去多士懷之

朱夢弼浙江秀水人崇禎十三年由舉人任州學正

博學工翰墨潔清自治上官敬禮之署徐屬河防  
又署戶部事皆有清節惠政

何騰蛟山陰人崇禎壬午爲淮徐兵備時徐境土寇  
蜂起張方造王道善分掠豐沛程繼孔踞蕭之饒  
山四出焚劫騰蛟至卽率兵渡河攻剿以次皆平  
師還次蕭以繼孔本蕭民與他盜異單騎抵其巢  
諭降之明年冬擢巡撫湖廣

國朝

陳嘉允山東東平人順治二年由舉人以戶部郎中  
管徐倉修葺衙宇創建倉廩招商賈撫軍民裁額

銅山縣志

卷十二

名宦

十八

外之征商民爲建德政碑

王維屏字帶汾陝右人順治四年由舉人以戶部郎  
中管徐倉爲政清簡商民不擾後爲武昌知府遷  
通密副使

張雲翼洛陽人起家進士順治九年任徐倉戶部郎  
中嗜文學公餘日以著述爲事惠商恤民汰冗役  
商民懷之

顧大申字見山華亭人由進士授工部主事分司夏  
鎮河道廉幹有才治尙嚴峻姦人懼赴京羅告遣  
刑曹會總河訊問皆虛告者伏罪陞郎中

江雁卿江西新城人康熙八年知徐州約已率民不  
事刑朴州舊有版荒地四千七百餘頃丁糧未除  
久爲民困爲力請上官奏免之卒於官囊無一錢  
州人爲具棺歛崇祀名宦

孫枝蕃陝西三原人康熙十二年知徐州時黃河汎  
溢居人悚懼乃出私財募人夫取石築堤護城亘  
數里城賴以全徐民夙苦協濟夫役一徵發輒數  
百千人蕃力請上官免之滇閩變作官軍多道於  
徐蕃竭力供億公帑不足繼以私財又繼以假貸  
卒不一擾民間遂坐逋負憂勞卒於官今崇祀名

宦

佟國弼奉天人康熙三十九年知徐州值歲饑力請  
蠲賑嘗發常平倉麥二千餘石假貸饑民明年又  
饑民不能盡償弼代爲償之黃河北自李道華口  
至蘇家山舊無堤數遭水患乃出私錢築子堰數  
十里歲得有秋徐俗貧人生子多不舉弼捐貲立  
育嬰堂募乳媪哺養全活頗衆卒於官貧無以殮  
人皆爲痛哭今崇祀名宦

孫詔武威人雍正二年知徐州治匪類禁淫祀以正  
風俗爲己任州城自康熙七年地震頽圯垂五十

年詔使修築完固去後人思之不忘

姜焯昌邑人牧徐州善政多端其九著者修櫺星門  
建尊經閣又於雲龍山勅立義學捐俸延師所成  
就甚衆徐人士至今追思不置云

李根雲趙州人徐初改州爲郡莅政初卽詳請增添  
文廟侑生及樂器延曲阜樂師教習其樂器悉如曲阜  
聖廟制又因黃茅岡舊址建雲龍書院首捐已俸率合郡  
官及縉紳家成之多方設置學田以爲膏火資延  
名公指授生徒迄今人文蔚起四載陟揚州齟使  
後擢廣饒九南道

銅山縣志

卷十二

名宦

二十一

石杰桐鄉人寓渾厚於精明人敬憚之而悉革其易  
心因以澄敘官方曲成僚屬焉先爲徐州牧因改  
府調補邳州復擢守徐民樂其來如旱之望澤居  
數年擢四川建昌道

莊亨陽南靖人精於理學居署常手不釋卷代石公  
爲政寓精明於渾厚外則循循誨人不露聲色內  
則冰壺朗映纖毫不敢欺安雅恬靜俾民自然  
樂業陞淮海徐道

邵大業順夫大興縣人雍正癸丑進士歷任黃陂禹  
州等處皆以清廉著任徐州府時以徐城三面距

河城西舊有蘇堤歲久湮廢捐廉修築以資保障  
於堤首建蘇公祠開浚荆山橋河以便耕種又捐  
修呂梁鳳冠山

文廟增建大殿置田頃餘奉春秋二祀暇則招集生童講  
說易春秋大義徐人至今頌之

王兆棠浙江杭州府錢塘縣人守郡時惠愛士民乾  
隆四十四年秋大水積旬不退合郡驚惶公晝夜  
巡視北門外大堤裏身有滲漏公乃脫冠服塞之  
竟得不潰士民至今猶稱道焉後陞蘇松道

松齡正紅旗滿洲進士徐郡素苦飛料公於乾隆五

銅山縣志

卷十二

名宦

二十一

十年到任廉知其情卽詳請上憲裁免民困頓息  
陞常鎮道攀轅送者萬餘人後署蘇臬以終養歸  
宋觀光四川順慶府營山縣人拔貢生鑲藍旗教習  
復中式副榜乾隆五十一年任徐州府時歲大饑  
斗麥千錢飢民甚衆公憇爲請賑復請發米平糶  
設場五處親爲巡察禁書役侵勒全活萬人  
伊楞額鑲藍旗滿洲人五十一年任協鎮時歲大饑  
飢民數萬勢將攘奪公整飭營伍彈壓各處粥場  
嚴而有制全郡以安皆公之力復捐廉濟賑至今  
民猶感念之

康基田山西太原興縣人乾隆丁丑進士任徐道時  
捐修府城及呂梁鳳冠山

文廟疏通溝渠以涸民田咸資賴之改建雲龍書院增齋  
舍爲肄業所作勸學箴爲生童法每課必親自講  
授士民感其教澤歿後立祠於書院祀之

田自福順天深州人任徐州府時矢心公平人不忍  
欺會府試公因非科目出身乃與所延閱卷友設  
案於見天堂焚香矢祝以故榜前列者率寒畯八  
邑士子咸服其公

鰲圖鑲紅旗漢軍于氏乾隆庚寅順天舉人嘉慶二

銅山縣志

卷十二

名宦

二十二

年由太倉州調徐督催引河民夫均感辦理災賑  
嚴戒侵冒窮民咸沾實惠四年補授府任捐修  
文廟節孝祠添書院膏火時爲生童講說經義徐州素少  
科目自此文風一振相繼登科第者七人陞授徐  
道遇河水異漲親駐工次督率搶護士民感其教  
養歿後設位於四賢祠祀之

劉晉燾昭文縣舉人嘉慶九年任公秉鐸以來獎勵  
後進常如不及生童請業者學舍常滿凡任中節  
孝及古今人物凡舊志中所未備者錄成一帙鈐  
印申府縣以備考今修志尙資採焉

俞穎達浙江山陰縣人任徐州府三年清慎自持不  
名一錢遇士民必以忠孝安分爲勸勉遇事明決  
平豐邑段姓冤獄立致澍雨鋤銅蕭大蠹如汪松  
宗魁等民氣大和郡南奎河久湮盛漲時積澇數  
十里郡城亦苦倒灌公大加挑濬並疏荆山口河  
郡中水害以息他若創設義學修理橋梁諸善政  
不可殫述奉諱去任以積勞卒士民感之公捐資  
建祠隍廟西以祀

高攀桂陝西澄城縣人附貢生任銅山縣時歲饑爲  
民請賑親自查勘散給嚴戒晝役侵漁務使災民

悉沾實惠全活甚衆疏挑荆山橋藺家山等河以  
蘇民困聽訟虚心研究不牽連平人卒於官士民  
至今猶尸祝之